



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 6

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Mizoram CM Zoramthanga-i Zo kin ajak longjemtsü ayonger

Wagner tekolakba Belarus tongogo: Lukashenko

VOL. XX NO. 256 (ADOK 256) DIMAPUR YANGTEPNÜ (THURSDAY)

AAMI (JUNE) 29, 2023

₹ 5.00

Aluyimer 250 nem GI user authorization agütsü

Kohima, June 28, 2023

(TYO): Union Ministry of DoNER kübok North Eastern Regional Agricultural Marketing Corporation (NERAMAC) ajanga Bodbarnü Nagaland nung aluyimer 250 nem Geographical Indication (GI) certification amshitsü temelaba agütsüogo.

Tanü NERAMAC-i ayongzükba GI awareness seminar cum exhibition nung Naga Tree Tomato aser Naga Sweet Cucumber atema GI certification agütsü.

Managing Director NERAMAC, Commodore (Retd), Rajiv Ashok, National Bank for Agriculture & Rural Development (NABARD) Nagaland General Manager Tiakala Ao, Horticulture Department Director Meyasashi aser Agriculture Deputy Director James Chawang nunger den NERAMAC ketdangsürtemi certificates agütsü.

"GI ajanga tesem ka nung produce mesüra item adokba temeten angur. Kümtem süia arudang NERAMAC ajanga North East Region nung agri-horti produce 13 nem certification agütsüba nung yaritepogo aser iba nung Nagaland nungi product ana dena lir" ta MD NERAMAC, Ashok-i ashi.

NERAMAC-i yaritepa GI products angubaji Karbi Anglong Ginger & Tezpur Litchi of Assam, Arunachal Orange, Chak

Hao (Black Rice) & Kachai Lemon of Manipur, Memang Nareng & Khasi Mandarin of Meghalaya, Mizo Cilli of Mizoram, Dalle Khursani & Large Cardamom of Sikkim aser Queen Pineapple of Tripura lir.

NERAMAC-i ita ka ser tesadang jakdang nungi iba mapa tenzük aser NER indang state ajak nungi user authorization forms 800 reprang aser GI Registry, Chennai dangi temelaba meshia zülü, ta Ashok-i ashi.

Temelaba anguba ajanga shishilemba asüdag GI symbol aser certification amshitetsü, ta pai ashi.

"Prime Minister-i aluyimertem teimba ajangzüksü atema mapa inyaksü tuyuba nung iba mapa ajanga yariteper. NER region nung sobaliba nungi beshia aruba aluyimba maparen aser products ajungkettsü aser kümzüka ayutsü atema GI initiative ya kanga tongtipang lir" ta pai metetdaksü.

NERAMAC-i Nagaland nung agri aser horticulture products talila GI registration asüba nung yariteptsü, ta Ashok-isa ashi.

"Nagaland nung GI tag ajanga traditional products ajungkettsü aser aluyimertem kümzüka ayutsü. Iba ajanga India aser bendang linüktem nung item products tajungba yokyayokji sütetsü" ta NABARD Nagaland general manager, Tiakala Ao-i ashi.

Chümoukedima ya 'Mini Nagaland' lir: La Ganesan

Dimapur, June 28, 2023

(TYO): Nagaland nung Dimapur aser Kohima sülen urban tesem tulutibaji Chümoukedima district lir aser tanga district tem dang nungi tia takaba lir aser 'Mini Nagaland' ta ajatsü tetemsü ta Nagaland Governor La Ganesan-i ashi.

Governor Ganesan-i Bodbarnü Rhododendron Hall, Chümoukedima nung civil society teloktem aser heads of departments den sensaksem senden ka amandang iba osang metetdaksü.

"Chümoukedima district ya alinük tajung lir, temo aketba ali lir aser aluyimtsü aser shishilembatsü tsüngsang-mopung tajung lir. Chümoukedima district nung central institutions aser universities aika lir aser school o college aika lapoka lir" ta Governor-i ashi.

Chümoukedima district dang 'Mini Nagaland' ta shitak ajak aser kin ka dang masü saka Nagaland nung kin ajak alir, ta paisa ashi.

Chümoukedima dang masü saka Nagaland nung district ajak nung basic infrastructures 4-education, adequate health care, good roads aser adequate banking facilities lidaktsünür, ta Ganesan-isa metetdaksü.

"Asenoki quality education nung temulung agütsüsüla. NEP tasenba ajanga maongka aika agütsür aser tanurtem nem sobaliba tesayuba den modern educational practices agütsür. Anungji shisaliok reju ajaki national policies sülen anidakba kaketshirtem ajangzükdaksütsü ayongzük" ta Governor-isa ashi. Ganesan-isa healthcare service indang jembidang "tanü sorkar dak sendakba scheme aika tenzükba lir aser item rongnung Ayushman Bharat, Pradhan Mantri Bima Yojana, Pradhan Mantri Suraksha Bima Yojana aser Nagaland indang CM Health Insurance Scheme dena lir" metetdaksü.

Paisa district health authority aser talisa Tuberculosis Officer dang PM TB Mukta Bharat Abhiyan kübok TB samatsütsü atema osang prokshitsü ayongzük.

Nagaland Governor-i Public Health Engineering Department (PHED) dang senso ajaki JJM scheme tajangzük angutsü atema inyaksü mepishia metetdaksü.

Senso shiai Jan-Dhan account alitsüla aser iba atema District Lead Bank Authority-i yimtsüing ajak nung financial literacy camps ayonga agütsüla, ta Ganesan-isa ashi.

NSF-i Manipur atema candlelight vigil agi



Kohima, June 28, 2023

(TYO): Manipur nung mepetmesü adokba raraba sülen anogo 55 tema süiaka Prime Minister Narendra Modi-i ola madokba aitsür ta North East Students' Organisation (NESO)-i metetdaksü.

"Tensa kanga mejungi kümaka Prime Minister-i ola madokba atema aoksar. Pai ola madokba ajanga linük tongtiba shilem nungi North East nung lisopurtem balaka bendangtsü" ta NESO secretary general Mutsikhoyo Yhobu-i ashi.

NESO kübok Naga Students' Federation (NSF)-i Manipur nung tensa süngjemtsü aser azütokshi anentsü atema Candlelight Vigil ka ayonga agidang Yhobu-i iba olen jembi.

"Manipur tensa nung India sorkari miim tebilemba kar melira Prime Minister-i ola adoktsü ayongzük" ta pai ashi.

June 22 nü Guwahati nung NESO senden nung Northeast state 8 unit shia nung candlelight vigil agitsü lemtet. Iba ya Manipur sensotem dang ozüing alema inyakba anentsü aser state o centre sorkartem dang tensa süngjemtsü atema mapa inyakang ta ayongzüksü atema lir, ta NESO secretary general-i metetdaksü.

"Union Home Minister-i Manipur semdanga armed personnel 40,000 tema den state police force aliba pa tenük agi nguogo. Ajisüaka iba ajanga Manipur nung nisung tepsetba aser ozüing alema inyakba manendaktsür aser iba ajanga Centre sorkari iba tensa azüoktsü asoshi nendaka mebilemba sayur" ta paisa ashi.

NESO-i yimjung aser tesünep osang bener Manipur semdangtsü lemtetogo. Kin anaprong olemteptsüsa sabang ka

onoki yanglunür, ta Mutsikhoyo Yhobu-i ashi.

"Iba mepetmesü ajanga nisung meyrjang aika pei talidak toktsür ogo aser nisung 100 tema samaogo. Tenla ki aika raksatsüogo aser yimtsüing 200 nung kiojen 500 tema raksaja lir" ta NSF president Kegwayhun Tep-ia ashi.

"Iba candlelight vigil ajanga onoki Manipur nung alirtem dang Naga nunger aser NSF nenok den külemi noktaka lir ta sayunür" ta pai ashi.

NSF president-isa Centre sorkar dang iba tebilemstü atema süoki ia mapa inyaksü aser yimjung bener arung ta mepishia metetdaksü.

Iba sentong nung NSF coordinator to NESO Ezanhung Ngully menden liasü aser Mao Baptist Church Kohima Associate Pastor George Arche-i temoatsü meshia sarasadem.

UCC kübok Nagaland madentsüla: Ao Senden

Dimapur, June 28, 2023

(TYO): Ao Senden-i Law Commission of India dang Uniform Civil Code (UCC) kübok Nagaland medendaktsü atema shidi ka züluogo.

"Nagaland nung UCC mapa inyakra ibaji Constitution of India nung Arlla 371A nung Naga customary law & practices agizüka aliba anema

asütsü" ta Ao Senden-i Member Secretary, Law Commission of India dangi züluba shidi nung shia lir.

India nung political agreement ka ajanga akümba state ji Nagaland dang lir aser iba dang 16-Point Agreement ta ajar. Iba nung India sorkar aser Naga Peoples' Convention nungi teshimtet nübotemi sign sütepa

liasü, ta Ao Senden-i ashi.

Constitution of India nung Arlla 371A enokba ajanga 16 Point Agreement nem constitutional guarantee agütsü aser iba ya Constitution (Thirteenth Amendment) Act. 1962 ajanga Nagaland state atema balaka enoksemba lir, ta Ao Senden-isa Law Commission dang metetdaksüogo.

DAYO-i DGP Rupin Sharma den shisalemsatep



Dimapur, June 28, 2023

(TYO): Dimapur Ao Youth Organisation (DAYO)-i June 27, 2023 nü PHQ nung DGP, Nagaland Rupin Sharma, IPS den ajurutepa senden ka menogo.

Iba mapang DAYO-i Rupin Sharma nem tenüngsang agütsü aser onük aika benoka lemsatep.

Public-i shilem magira police mapa aser law & order tiptema ayuba maparen nung takok mangutsü. Iba jagi onoki maneni

Police Department den amalitepa ozüing alema inyaksangshiba aser talisa tashiyim agi sen saruba aser drugs shibelenba azüokba nung yariteptsü ta DAYO-i DGP Rupin den sensaksem dang ashi.

DAYO-isa kasa tangatetba aliba teloktem aser lanur teloktem den külemi community policing nung yariteptsü aser Nagaland nung ozüing akhümtsübuttsü asoshi mapa

inyaktsü, ta parnokisa ashi.

Iba mapang DGP Rupin-ia sensotemi shilem agia tashiyim agi sen saruba, drugs shibelenba aser tanga ozüing alema mapa inyakbatem azüoktsü atema inyakyim tasen tenzükba osang lemsatep.

DAYO-isa Nagaland nung senso ajak dang asen state tajungba kümdaktsütsü atema police den amalitepa yariteptsü mepishia metetdaksü.

Dimapur District Planning & Development Board senden menogo



Deputy Commissioner, Dimapur indang Conference Hall nung June 28, 2023 nü Dimapur District Planning and Development Board senden amendang Advisor aser Dimapur DPDB chairman, Moatoshi Longkumer-i züngsemtem den jembidang tangokba noksa nung angur.

Dimapur, Aami/June 28 (TYO): Ita shia amenba Dimapur District Planning and Development Board (DPDB) senden June 28, 2023 nü Deputy Commissioner, Dimapur indang Conference Hall nung mena liasü.

Iba senden nung Advisor, Labour Employment and Skill Development, Excise aser DPDB Chairman, Moatoshi Longkumer-i züngsemtem aser district nung ketdangsur ajak dang kilentzü aoba lenmang nung jana meindoktsü aser nisung shia mürekmejiba yimya amshitsü asoshi osang sangdongtsü ayongzük.

Tawa Dimapur nung zümetsüing adokba ya nisungi yangluba timtem ka lir, koba kilentzü aoba lenmang nokdangba nungi adok, ta pai ashi.

Paisa District Administration aser DMC dang nüburtemi kilentzü aoba lenmang nung jana indokba noksa tangoktsü aser kilentzü aoba lenmang agia aortem anema tapet temerenshi agitsü asoshi tejanga kuli bendentsü ajungshi.

Department balalai Dimapur yimti tebour tajungba kumdaktsüsü asoshi süngdonglidong atemba atema Dimapur DPDB chairman ajanga pelaba lemsatepa liasü.

Iba senden nung agenda balala benoka jembi aser item rongnung Dimapur district kübok dokan ajak aser yimtung nung CCTVs inoktsüba indanga jembia liasü.

Chairman ajanga department ajak dang sorkar indang ki o jen aser oset kumzüka ayutsü mechi office nung CCTV inoktsü ayongzük, kechiaser auyaba tali akumer. Iba atema totuyuba ka agütsüsü, ta Deputy Commissioner, Dimapur ajanga metetdaksü.

Ano yimti menenja cable wire mesangshia aliba aser telephone post songa aliba agentsü indanga jembia liasü. Iba dak sendakba nung district administration ajanga Cable TV agütsürtem ajuruogo aser SDO (C) ajanga tesem balala sema jajaogo aser tapet mera agiogo, ta DC Dimapur, Sachin Jaiswal, IAS ajanga ashi.

DC office tasen ka

meyanglu tashi khen atema danga tesem nung belena atatsü asoshi sorkari dangi abentsü pangzüng ka senden nung agizüka liasü.

Maneni Zeliangrong Colony, Dimapur nung aliba Chingthur Foundation aser Viola Colony, Dimapur nung aliba Hutmen Charitable Society registration atema sorkar dangi abentsü lemtet.

Lamstand Higher Secondary School, Toluvi Village, Dimapur ben Grant-in-Aid agütsüsü aser Nepali Bosti nung aliba King David School, Sector-3 Kushiabill-i belentsü indanga jembia liasü.

Dimapur nung aliba GMS Dimapur Town nungi Govt. High School, United Colony upgrade asütsü, GMS Padumpukhuri nungi Govt. High School upgrade asütsü; GPS Mishikito nungi Govt. Middle School, Phaiphijang ta upgrade asütsü; Stepping Stone School, Duncan Bosti aser Lingrijan, Dimapur nung aliba Immanuel College society registration indanga senden nung jembia liasü.

Mokokchung nung Youth Festival amung



Nehru Yuva Kendra Sangathan ajanga District Administration, Mokokchung den lungjemer June 28, 2023 nü Town Hall Mokokchung nung Yuva Utsav sentong ayongzüka agidang tangokba noksa ka yangi angur.

Dimapur, Aami/June 28 (TYO): Yuva Kendra Sangatham (Ministry of Youth Affairs & Sports, Govt. of India) ajanga District Administration, Mokokchung den lungjemer June 28, 2023 nü Town Hall, Mokokchung nung "Panch Pran of Amrit Kaal" omen kübok Youth Festival (Yuva Utsav) ayongzüka liasü.

Iba sentong nung o jembir aser Deputy Commissioner, Mokokchung, T hsuvisie Phoiji ashiba agi, lanurtem molungjang nung linük meimba lidaktsüsü asoshi iba amala sentong ya ayongzük, kechiaser lanurtem ya linük tarutsü asoshi lir.

Anungji lanurtemi iba amala

sapang nung pei sempet sayutsü maongka agitsüla, ta pai ashi aser lanurtem dang tasü ita pei sempet renlokdaktsüsü ajungshia liasü.

Iba sentong nükjidong lemsatepdang, India ya lanurtem linük ka lir aser lanur dak tashi lir, anungji sorkari linük yangertsü asoshi lanur dak rangloker, ta District Youth Officer NYK, Mokokchung, S.T. Haokip-i ashi.

Iba sentong nung menden Sentirenla Ozukum, NYV liasü aser Imtijungla, NYV ajanga melepzüng o jembia liasü. Iba sentong nung Painting, Poetry, Photography, cultural presentation aser declamation nung tetoktepba agia liasü.

Painting tetoktepba nung mezüngbuba jenjang Imlikaba Jamir aser tanabuba jenjang Tialong Imchen nati ngua liasü. Poetry (sangro) züluba nung Toshisenla-i mezüng aser Arenmong-i tanabuba jenjang angu.

Mobile Photography nung Limasunep Longkumer-i mezüng jenjang aser Along T. Imchen-i tanabuba jenjang ngutet. Declamation nung Imolemla-i mezüngbuba jenjang aser Medemren Longchar-i tanabuba jenjang ngua liasü.

Cultural tetoktepba nung mezüng jenjang Sumi cultural club aser tanabuba jenjang Jubilee Memorial College ajanga ngutet.

Mejangjaba tasü mang ka nguteta lir

Dimapur, Aami/June 28 (TYO): Arishi küm 50-60 tsingta nisung (non-local tebur) tasü mang ka train track KM NO-260/3 nung süa lir, ta Station Manager, NF Railway Dimapur nungi tezüluba ka GPRS dangi June 28, 2023 anepdang 10:15 ako meta arua liasü.

Iba osang nung ajemdaker duty party tem nisung tasü mang aliba tesemi oa mita bushia liasü. Iba nisungba ya meshitsüyar asütsü südi ta temolung melemi lir aser pa asüba nung tim masüba mapa

inyakba kuli kecha mongutet.

Iba nisungba ya tula sentsü temesüing aser long pant aut sentsü semer liasü.

Ozüng agi melaba maparen ajak tembangba sülen tasü mang ya PM examination/jangjatsü atema District Hospital Dimapur Morgue nung yua lir.

Kibur/kinunger/tembar temi Officer-in-Charge, GRPS, Dimapur den Mobile No. 7085055021

ajanga tongteprateptsü akok, ta sangdong ka ajanga ashi.

Muslim Council ajanga Idd-ul-Azha salem lemsatep

Dimapur, Aami/June 28 (TYO): Nagaland nung aliba nüburtem ajunga dangi Idd-ul-Azha benjong salem abener, ta Muslim Council Dimapur ajanga sangdong ka nung ashi, koba June 29 nü amunger.

Muslim Council Dimapur indang working president, A.Rahman ajanga sangdong ka nung ashiba agi, iba sarasadem

aser bendanga agütsüba benjong ajanga Nagaland nung aliba nüburtem ajunga dangi yimjung aser temeimtep tasen bener arutsü amanger.

Qurbani atema takum shiruru tenladang danga tamangba yimsü amangertem temolung meyrutsüsa inyaktsü ajungshir, ta Muslim Council Dimapur ajanga sangdong nung ashi.

Kohima nung Job Fair ayongzüka agiogo



Dimapur, Aami/June 28 (TYO): Directorate of Employment Skill Development & Entrepreneurship ajanga National Career Service Centre for SC/ST, Ministry of Labour & Employment (DGE) Kohima, Nagaland aser Tusti Foundation Guwahati den lungjemer June 26, 2023 nü Directorate of Employment, Skill Development & Entrepreneurship Building,

ITI complex, High School Road, Kohima nung Job Fair ayongzüka liasü.

Recruitment atema Goa nungi Deltin Company arua liasü aser mapa bushir nisung 45-i iba interview nung shilem agi.

Mapa bushir nisung tenet nem idangjisa 'offer letters' agüja liasü aser interview round tanabuba atema candidate trok shimteta liasü.

NVBDCP ajanga Dengue nungi nüburtem jenbua alitsü ayongzük

Dimapur, Aami/June 28 (TYO): Meyi mapang ya merila, talisa aedes aegypti species apoktsü asoshi mapang tajung lir, koba ajanga dengue virus menashir.

Dengue ya virus ajanga adokdaksür aser iba tashidak keta aliba merila tetsüi metepba nungi prokshir aser cases kar nungbo nisung asür. Dengue tashidak anepalutsü tejanga mali aser iba tashidak putetba mapang kanga junga anepalutsü nüngdaker.

Dengue tashidak poktetba mapang aser iba tashidak nungi jenbua alitsü asoshi National Vector Borne Disease Control Programme ajanga nüburtem dang mera balala agitsü ayongzük.

Iba tashidak nungi kumzüka alitsü atema nüburtemi 'insecticide repellents' amshitsüla, anüngdang aser aonung merila sü (LLIN) amshitsüla, tula aser long pant talang asemtsüla, ta ashi.

Merila apokba azüoktsü asoshi ki temeket nung, tires, naro atemba 'pot' nung tzu atsüngtena mayutsüla, kilentsü shidak yimdaktsüsüla aser tzu bendena ayuba shibanga mayutsüla.

Ki temeket nung yimzüka moi atsüngtena aliba tzu bushia yimdokdaksüsüla.

Dengue merila ya bottle temaketsü ama container tilatiba nunga tzu atsüngdaka alidak apoker, anungji merila apokba tesem tila-tulu ajak indoktsüla.

Hopta ka nung 'one dry day' amungtsüla aser iba mapang ki temeket nung aliba container ajak nungi tzu azüngtettsüla.

Ki temeket nung tzu atsüngtena ajanga dengue aketba merila apoktsü aser ibaji ajanga merila timba akumtsü. Dengue aketba merila ya yimzüka maoba tzu nung apoker, anungji kodanga ki müketa aliba container nung tzu mayutsüla.

Fogging ya khen atema dang lir aser teti asoshiبو nüburtemi shilem agiba ajanga dang 'tiger mosquito' ta ajaba Dengue merila azioktettsü.

Dengue merila nung sentsü tanak aser temesük ayak keta lir. Temang metabo lira idangjisa anasatiba mozüki bushitsüla.

Dengue merila yagi timba anepdang aser nikongdang meteper. Iba tashidak aliba merilai metepba sülen virus ya azü nung anogo 2-7 tashi jajar aser iba mapang temang rongga metar.

भारतीय राष्ट्रीय कांग्रेस Indian National Congress



June 28, 2023 nü AICC headquarters, New Delhi nung Congress Tir, Mallikarjun Kharge, AICC Chhattisgarh Incharge Kumari Selja, party lenir Rahul Gandhi aser KC Venugopal nung senden ka nung adenba noksa nung angur.

Tanü Rahul-i Manipur nung relief camps aser lokti balala ajurutsü

New Delhi, June 28 (Agencies): June 29 nungi tenzüka Congress lenir Rahul Gandhi-i anogo ananü Manipur semdangtsü, ta Congress General Secretary, KC Venugopal-i metetdaksü.

Rahul-i Manipur nung relief camps semdangba den külemi state yimtiba, Imphal aser Churachandrapur na nung lokti tentet balala ajurutsü.

Taoba ita tetenzüklen Manipur nung rara adokba sülen tang nisung 50,000 dak tema state tesem balala nung aliba relief camps 300 nung jenoka lir.

Manipur nung Meitei aser tribal Kuki nung tsüngda raraba sülen tang tashi nung nisung 130 dak tema süogo, aser takoksa angurtemji teimbaka tribal Kuki nungertem lir.

Rajya Sabha MP, Venugopal-i twitter ajanga, "Rahul Gandhi-i June 29-30 anogotem nung Manipur semdangtsü. Pai relief camps semdangtsü aser Imphal o Churachandpur na nung lokti tentet balala ajurutsü. Manipur nung ita ana jungnüa raradar, aser loktiliba balalai rara nungi yimjung atema taneptsüba nüngdaker. Iba ya meimchir dak sendakba lendong lir, anungji tesempa agi masü saka temeim agi inyaktsüji onok teinyaktsü mapa lir," ta metetdaksü.

Congress-ibo tang Manipur nung tensa majungba ya BJP-i telemsa adokdaksüba mapatongtem benokba ajanga lir, ta tai tongloksür.

Mongolbarnü Manipur Chief Minister, N Biren Singh-i relief camps nung jenoka alirtem shia

nem sen meyrjang kaka (1,000) teyari agütsütsü, ta sangdongogo.

Imphal East district kübok Khuman Lampak Sports Complex nung amenoka aliba relief camp nung jembidang chief minister-i, relief camps nung alirtem süoshi aser nüngdakba balala alitsü atema sen meyrjang kaka teyari agütsütsü, ta metetdaksü.

Manipur nung Meitei nungertem Scheduled Tribe (ST) jenjang akhangba anema Kuki tribals-i longkak aitba ajanga rara tenzüka liasü. Manipur nung nütsüng shilem 53 shi Meiteis nungertem lir aser parnok teimbaka Imphal Valley nung lir. Ano nütsüng shilem 40 ji state nung tribals - Naga aser Kuki nung lir aser parnok hill districts nung alir.

Ato kilonser Modi-i UCC atema jembiba VHP-i pelaa agizüker

New Delhi, June 28 (Agencies): Bodhbarnü Vishva Hindu Parishad (VHP)-i, Ato kilonser Narendra Modi-i Uniform Civil Code (UCC) atema jembibaji VHP-i pelaa agizüker; iba ozüng benokba ajanga linük nung tetsürtem anema inyakba anentsü, ta ashi.

Mongolbarnü Ato kilonseri Uniform Civil Code (UCC) atema jembiba den külemi opposition-i Muslim nung jashidaktsütsü atema UCC onük amshir, ta aitsü.

Bodhbarnü VHP working president Alok Kumar-i sangdong ka ajanga, "Ato

kilonseri UCC indang jembiba nungji onoki ai-aura akar. Onoki ibaji pelaa agizüker. Linük temzüng nung Arrla 44 ajanga tekaraba nung linük atema Uniform Civil Code ka yanglutsü atema sorkar nem temelaba agütsür," ta metetdaksü.

Supreme Court-ia, civil codes balala alitsüji tim masü ta jembio, ta pai ashi.

"Temzüng alema inyakba ozüng, contract ozüng, commercial ozüng aser banking ozüngtem ajak kasa dang, anungji kibongtem atema-a kasa ozüng malitsü asü?," ta pai asüngdang. Opposition party tem aser

Muslim telok balalai UCC ashishiba atema aija VHP leniri, "India linük temzüng kübok alitsü aser inyaktsü atema tenangzükba agia alir MP tem aser MLA temi tesüiba küm 75 nung linük temzüng nung aliba ama meinyakba atema ni süngmanger," ta ashi.

Tetsür ajak taküm akhüm keta litettsüla aser tebur den kasa züngshitsüla; ibaji ajaki agizüktettsüla, ta pai ashi.

"Anungji UCC ajanga tetsürtem bendangshidanga züngshiba anentsü. Talaq (balalulaba) ozüng ya kasa dang asütsüla," ta pai ashi.



June 28, 2023 nü Birbhum District nung BJP Zilla Parishad candidate, Rama Biswas (tiyong) leniba nung West Bengal Panchayat elections atema nüboyimdang tangokba noksa nung angur.

July 24 nü Rajya Sabha menden 10 atema election agitsü

New Delhi, June 28 (Agencies): July 24, 2023 nü Rajya Sabha menden 10 atema election agitsü; item RS menden rongnung foreign minister S Jaishankar aser Trinamool Congress MP, Derek O'Brien nati atsünga aliba menden densema lir, ta Election Commission-i metetdaksü.

Iba election ajanga kecha balaka masütsü ama asadangteter, kechiyong West Bengal, Gujarat aser Goa nung aliba item assemblies nung peipei party-i maneni takok angutsüa akok.

Ajisüaka West Bengal nungbo Congress-i atsünga aliba menden nung BJP-i takok angutsüa akok.

July ita nung Goa nung Rajya Sabha menden ka azüngtetsü aser August ita nung West Bengal nung menden trok aser Gujarat nung menden asem azüngtetsü.

Goa nungi BJP MP tem-Vinay D Tendulkar aser Jaishankar na aser Gujarat nungi BJP MP Jugalsinh Lokhandwala

asert Dineshchandra Anavadiya nung MP kümsük July ita nung tembangtsü.

West Bengal nung TMC MP tem- O'Brien, Dola Sen, Sushmita Dev, Shanta Chhetri aser Sukhendu Sekhar Ray nung kümsük July ita nung tembanger aser West Bengal nungisa Congress MP, Pradip Bhattacharya kümsük August ita nung tembangtsü.

Election Commission-isa West Bengal nung TMC MP aser taoba mapang Goa chief minister Luizinho Joaquim Faleirio-i April ita nung azüngtetsüba menden atema by election agitsü sangdongogo.

Item election agiba sülen kasa anogo nungsa nikongdang 5:00 ako nungi vote azüngtsü.

Tang Rajya Sabha nung menden 238 atsünga lir. House nung MP teimtibaji BJP (MP 93) lir, iba sülen Congress (31), TMC (12), DMK (10), AAP (10), Biju Janata Dal nungi MP 9 aser YSR Congress Party nungia MP 9 lir.



June 28, 2023 nü Lucknow nung Samajwadi Party Tir, Akhilesh Yadav-i taoba mapang Gujarat chief minister Shankersinh Vaghela ajurudang tangokba noksa nung angur.

Linük tesem ajaklen tzüngluruwa mongpu tenzükogo: IMD

New Delhi, June 28 (Agencies): India Meteorological Department (IMD)-i India linük tesem ajaklen tzüngluruwa mongpu tenzükogo, ta metetdaksüba den külemi state balala nung tzümetsüng dak sendakba lendong atema tekümdangtsü metetdaksüogo.

Himachal Pradesh kübok Shimla nungbo tzünglu maneni aruba ajanga anentsüh lendong den külemi tzümetsüng ajanga nisung aika süogo.

"Tesüiba anogo 4-5 tsüngda tzüngluruwa mongpu junga tenzükogo. Northwest India nung tesem kar dak alaka linük tesem ajaklen tzüngluruwa mongpu tenzükadokogo. Taruba anogo ana tsüngda south Punjab, Haryana aser tanüngba Rajasthan nunga tzünglu arutsü," ta IMD scientist Soma Sen-i metetdaksü.

IMD-i, Gujarat tesem kar nung tzünglu kanga sashia arutsü, talisa north Gujarat aser Saurashtra region nung tzünglu sashia arutsü, ta metetdaksü. Gujarat irrigation

department-i ashiba agi, state nung reservoirs 206 nungi 6 nungbo tzü kanga tali metsüngogo, aser iba dak sendakba nung lendong atalokra kümzükba maparen inyaktsü atema National Disaster Response Force (NDRF) aser State Disaster Response Force (SDRF) nungi team aika yoka lir.

Taruba anogo pongu tashi Himachal Pradesh nung tzünglu sashia arutsü aser tzümetsüng lendong ataloktsüa akok, ta IMD-i metetdaksü.

Thane, Raigad, Ratnagiri, Nashik, Pune aser Satara nunga tzünglu kanga arutsü, ta IMD-i metetdaksü.

Tzüngluruwa mongpu tenzükba ajanga state aika nung tali tatsük aliba süngjemogo, ajisüaka tzümetsüng agi tesem aika nung timtem agütsütsüa akok.

Tzünglu maneni aruba ajanga bengana jenjang kanga tuogo; bazaar nung bengana seret nung sen 10-20 aliba nungi seret nung sen 80-100 kümogo.



TIR YIMYIM

YIMOBILEM (EDITORIAL)

DIMAPUR YANGTEPNÜ, AAMI (JUNE) 29, 2023

Tajungtibatem rongnunga mezünpur

Tanü putu nung kaketshirrttem rongnung kaketshisatsü bushiba maparen ya reprangdangra kaket nung aliba kisüng ajak akok agibo tangar ajateta moutetba mapang ka lir. Tetezü, noklang shilem nung 99 angu agibo tangar memeneper, kechiyong noklang nung noklang angur aika adoker. Iba ama tashitemetet nung toktepba mapang tatidang nung telangzüksü purtem dang nungibo tasüngdangba renemtsü purtem khuretang tuluba akümer. Ibayongji, tang Nagaland Public Service Commission (NPSC) kangshiba angur. Aji oda, noklang nung noklang angutsü purtem asoshi tatidang nung asüngdangtsü atema tasüngdangbatem renemertemji anaben agia tatidang agütsütsü purtem dang nungi temetetba aser techiraba asütsüla. Tanü ama putu nung government mapa bushirtem asoshi tatidang agitsü atema tasüngdangba renembaji tangari renema akaba ajizüka renemba agibo majungtsü, tasüngdangba (questions) renemertem jagi ajak meteta makatsüa akok, kechiyong shibaibo ajak meteta ali, ajisüaka pai mesüra lai metetba nungi tasüngdangbatem renemtettsüa pa mesüra la dak tashitemetetba alitsüla. Ajisüaka, asenok tia majung tang NPSC purtemi iba ama nisungtemji bushia meinyaktetba tamakok ka nguogo. Government mapa nung süli, private mapa nung süli, tatidang agiba nükjidongji tajungertem rongnung tajungtiba shimtsü asoshi agir, kechiyong item jagi dang mapa akoktsü. Ajisüaka, ano tanü putu nungbo tatidang agiba ya tajungertem rongnung tajungtibatem shimtsüba dang masü saka tajungtibatem rongnunga mezünpur shimtsüa adoker, kechiyong tazünger aser tatidang agütsürtem ajak tajung dang, shiba shimer, shiba meshim ta asüba tensa tia ka nung tatidang agirtema timatemer aser shisaabolur. Iba ama toktepba mapang ka nung tatidang agirtemi tebang agi tasüngdangba kar asüngdangter mark agütsüsübaji tashi tulu aser kanga senti. Aji oda, alima asünungji tebang o agi tatidang agiba nungji ma ta tejak ajia yaritsüa akümtsübaji ana nung dang lir. Iba ama nisunger yimyak dak aketba tashimait ka anguba agi, NPSC ajanga agir anüngba government mapa Group C nung alibatem asoshi mapa inyakertem shimtsü tentetba, Nagaland Staff Selection Board (NSSB) ajanga agiba tatidangtem nungbo tebang o agiba tatidang asoshi mark-ji noklang nung shilem (5%) dang asütsü ta state government-i latetshitsübaji tajungertem asoshibo osang tajung asütsü. Tamasabo NSSB ajanga agiba tatidang nung tebang o agi agiba tatidang atema marks 12.5% yuja liasü saka NSF teloki anir kaketshirtemi iba mark-ji ajemtsüla ta akangba angateta government-i ajemtsübaji, atangji, lanurtemi government dang kanga pelatsüla. Tanü Nagaland shirangba tashidakji makamaitba timtem dang masü saka ochimashiba tashidak agi kangshir. Iba ochimashi ya vote agütsüba nungi tenzüka terenlok mapa inyakba, nübertem nem teyari agütsüba mapatem aser government mapa nung inyaktsü shimba maparen tashi nung bilemer mebilemjem aser zülur mezüluma ochimashi agi sünga lir. Aji oda, tatishitsü kaji, mapang talangka Nagaland nung Nagaland police shimtsü atema osang metetdaksüba mangu aser mangashi saka police-tembo zünger mezüngma shimogo. Ajisüaka, tanübo department karibo driver shimtsü tashi yimjak nung ajak nem maongka agüja metetdaksüba angur. Item jagi, odang ashir ashi, karibo Nagaland nung ochishia inyaktsü merangdargo ta sayur. Aji oda, Nagaland ya jungjunga yanglushidi süra, yimsüsürtemi inyakba maparentem nung dang masü saka NPSC aser NSSB mapatema akangshitsüla. Iba telok ana yagi Nagaland government tenzükertem shimtsü, anungji Nagaland ajungtsü majungtsübaji parnok dak tuluka keta lir. Parnok asoshi shisabolutsü khurettemji - Nagaland nung nübertem tenzüksü asoshi mashilen nungi shimra koda asütsü ? Nagaland nung mitkartem mapa sen agi ayok tenzükra koda asütsü ? Kar election nung tashiyim aser sen agi alia adok, kar sen agi alia ketdangser aküm, ano karbo kinunger aser temetetteper apia kecha mashi ser nung mapa inyaktsü shim ta süra Nagaland government-ji kechikomaka asütsü ? Item jagi kodaser Nagaland ya state tajungtibatem rongnung mezünpur sütettsüa yanglutettsü ? Atangji, itemji asenok ajak asoshi shisabolua bilemstüba khurettem lir.

OLEMSABANG

TEMELENSHI ADOKDAKTSÜBA LENISÜBA: MOSA TAKÜM ASER LENISÜBA NUNGI TANGAZÜKTSÜ KAR

~ Temsüyanger, CTC (source:- Mitkar)

Okila:

Tanü tensa lenisüba (leadership) aser lenir taküm indang shisadangra, pei indang aser pei asoshi dang bilemba aser inyakba lenirtem aser lenisüba agi sünga kümogo. Talisa iba ama tangatetba aser inyakyim ya tanü libaliru yimya ka kümogo. Tanü putu nung pei peria alitsü tangatetba ajanga, lokti tenzüksüba lenir aser lenisüba nungi pei asoshi ang tenzüksüba lenir aser ibalibaliru tangatetba agi ang kümogo. Lenisüba ya meimchir lokti tentet ajunga nung kangasa tongtibang asünung tanu kaket balala aika adoka kaketnang sünga lir, aser seminar-tem balala agitepba agi süngoko. Aiben temejakshiba ka dang mejakshir saka alima melenshia aoba den abet lenisüba tangatetba tajung aika nung mangur. John Maxwell-i ashir, temelenshi adokdaksüba lenisüba jagi nübertem anishir (influence), aser ibaji maneni ainer, anungji lenisüba jenjangjia maneni ainer. Pai maneni ashir, lenisüba takümü nübertem pa/la lenir ka asüba agi anidakba masü, mesura ozüng agi anidakba masü, saka odang nübertem pelashishia anidaknüba, ibaji chichiba lenisüba. Pai maneni ashir, lenisüba ya tangar madak tashi amshiba masu, saka tangar ka nem tashi agütsütetba dang melenshidaksüba lenisüba ta ajar. Lenisüba ya menden jenjang ka masü saka ibai tesendaktep lir. Lenisüba ya yimya ka (process), lokti nung lenisüba ajanga lokti ka anishidaksür (influence), aser iba jagi lokti alizüng tongdaksür. Jack Welch-i ashir, melenshidaksüba lenisüba yabo yimya-yimpong ka lir, iba yagi nisungtem taküm jenjangtem, temulungjang nung tebilembatem, libalirutem, aser tarutsü alizüngtem, item ajunga melenshidaksür. Melenshidaksüba lenisüba jagi talisa influence asür, kechiaser iba yagi tanidakertem yimlaba dang nungi tali ajangzükdaksür. P.G. Northouse-i melenshidaksüba lenisüba indang maneni yamai ashir, melenshidaksüba lenisüba ajanga lenir aser tanidakertem kati ka ajungmesoa kati ka jaklaliru ajungketdaksür. Iba ama lenisüba yagi lenir kati tanidakertem taginübatem aser teimlabatem meteta parnok nükjidong ajangzükdaksütsü asoshi meranger aser yarir. Melenshidaksüba lenir ka jagi mangdang tajung lokti nung agütsüteter. Chichia nübertem pa/la dak temulung lemteter, kechiaser pa/la taküm aser mapa ajanga nübertem nem tetezü tajung agütsür. Pa/lai nübertem taginübatem, mangdang aser nükjidong angateter, aser yamaji nübertem den putepba alitsü meranger. Item tangatetbatem dak ajemdaker Mosa taküm nungi temelenshi adokdaksüba lenisüba tangazüktsü kar bushidi. Aikati bilemstü, Laishiba nung aliba par putu aser tanü asen putu khenyongi balala asü nung Laishiba nung aliba lenisüba tangatetba tanü asen asoshi kecha menüngdak. Saka kodang asenoki Laishiba Tsüngrem o jungjunga shisadangdir, alima yimsüsüba lenisüba menden asüyonga, tanelar wadang lenisüba menden asüyonga, alima aser tanülar wadang lenisütsü asoshi Laishiba nung tesayuba aser tutuyuba tajung aika angutsü.

Mosa Taküm

Mosa taküm nung meimlaba mapa ka agi pa taküm tenzüksüba asenoki Laishiba nung angur. Mosa tetsu shisa akaba ajanga Nile ayong nung molok ka nung Mosa taküm kümzük. Faroa jalai chubar jabaso asütsü asoshi mulungtet, anungji chubar shisaliok angazükdak tajungtiba nung tangazükba tajung Mosai angu. Mezüng pa taküm takatet nung ljiip nung sobaliba aser par yimtem yimli tangatetba kübok aien. Yamaji tarutsü lenisüba mapa tulu asoshi Tsüngremi iba tia nung Mosa renemtsü. Pa yamaji chubar yimli kübok aser chuba taküm libaliru nung aliyonga par nübertem kechi tia nung lir pai meteta liasü (Ani. 1:13).

Kodang ljiip sepai nungbai lbri nungba tepsetba Mosai angu, pai par nübertem dak tashiyim aser azütokshiba marezmüktet. Pai khenyongi iba anema sashi sashia nokdak aser kasa temerenshi Mosai Egypt sepai nungba nem meyipa agütsü. Pai chichia kanga sashia nokdak (Ani. 2:11). Kodang ljiip sepai nungbai lbri nungba tepsetba Mosai angu, pa asoshi lenmang ana dang liasü; kecha mesüi dang toktsür oadoktsü; anabuba nung, pa nüki anguba anema nokdaksü. Pai nongnanga liasü (Ani. 2:12), saka kodang pa kisüngi iba azütokshiba angu ta pai metet, pai sepaiba dak mangayang aser pa temang lisem nung rema yutsü. Mosai tasü mang miima ayutsü merangba jagi pai ochi asoshi inyaktsü temulungtetba ka ta angateter. Mosa takümü tashiyim aser azütokshiba anema ajem ajema melitet. Ibai Mosa taküm jakla liru nung aketba ka liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristan aser lokti tentetemi Manipur nung yimjung akhanger



June 24, 2023 nü New Delhi nung Khristan telok aser melungtet telok 40 nungi züngsemtemi Manipur tensa anema rally agidang tangokba noksa nung angur.

June 28, 2023: India nung Khristan teloktem aser lokti tentet balalai maneni Manipur state nung yimjung atema takhangba agütsür.

May 3 nü Manipur nung rara adokba sülen tang tashi nung nisung 130 dak tema asüba den nisung 50,000 dak tema jenshiogo; takoksa angurtemji teimbaka Kuki tribal Khristantem lir.

June 24 nü New Delhi nung rally ka nung jembidang Khristantem temeden atema inyaker Minakshi Singh-i, "Manipur nungertem den tejashi lemsatapa Delhi nung organizations 40 dak tema adenshiogo. Onoki Manipur nung yimjung aginer," ta metetdaksü.

May ita nung Manipur nung rara adokba sülen nungi Ato kilonser, Narendra Modi-i iba atema ola kata madok, ajisiüaka tesüsa June 26 nü pai Union Home Minister, Amit Shah den

senden ka mena Manipur tensa atema jembioogo.

Uttar Pradesh state nung aliba melungtet telok Unity in Compassion nung general secretary, Minakshi Singh-isa, "Iba tebilemsü onük tangsa bentetsü atema Ato kilonseri inyaksü onoki akhanger," ta metetdaksü.

Delhi nung ayongzükbä rally nung shilem agir organizations-isa Union Home Minister, Amit Shah nem temepishiba shidi ka agütsüogo.

Organization balalai Amit Shah dangi züluba shidi nungji Tenla kitem raksatsüba aser nisung meyrjang aika jenshiba atema tejashiba lemsatapa lir.

Parnokisa Amit Shah dang, Centre sorkari relief camps nung jenoka allirtem nem chiyungtsü den nungdakba teyari balala peria agütsütsüla, ta takhangba agütsü.

Manipur state nungi Pastor Ezekiel M-i, tang state nung

tzüzüing ozüing tensa mejungi raksaogo aser prangpong amer teloktemi state yimsü südar, ta ashi.

"Küm aika tsüingda yangertetba kiojentem ghonda ishika tsüingda mitsü kuma rongdokogo.

Nüburtem aser kiojentem kümzüksüji state sorkar teinyaksü mapa lir, ajisiüaka state sorkari tamakok nguogo," ta Pastor Ezekiel-isa metetdaksü.

Delhi nung dang masü saka northeast nung aliba state asem-Assam, Nagaland aser Meghalaya den south tsütsü aliba Tamil Nadu state nunga Manipur tensa atema rally ayongzüka agi.

Meiteis Hindu nungertemi tribal jenjang akhangba anema May 3 nü Churachandpur district nung Kuki aser minority kintemi longkak aitba mapang nung rara adoka liasü.

Nütsüing teimba aliba Meitei Hindu nungem nem tribal jenjang agütsüra parnoki sorkar mapa, shisaliok aser lispour tem nem agütsüba maongka balala agitettsü.

Tenemlen aliba Kuki nungem ya teimbaka Khristantem lir. Meitei nungem nem tribal jenjang agütsüra parnoki tribal aliba tesemtem nung ali-kiojen alitettsü; iba jagi Kuki den lisopurtemi Metei nungeri akhangba anema longkak aita liasü.

Arogoi ashiba agi, iba rara tenzükbä sülen Kuki nungem yim 200 nung mi senoktsüogo aser Tenla ki 250 shi raksatsü mesüra rongdoktsüogo.

ANOGO ABEN TSÜNGREM DEN

Tsüngremer mulungba Tsüngremi akoker 2 Kor. 9: 6-15

Aser ajak nung teti nenok onsara teperi aka nung, mapa tajung ajak nung arentsü asoshi, Tsüngremi nenok nem taochi ajak rendaktsütsü akoker. 2 Kor. 9:8

Asenoki mapa sentong tapu balala aika yanglur. Teimla tulu nung tenzüker saka yimlaba ama mesüi atemer. Nisung shia dak tashi mait lir. Shingaia pai/lai inyaknüba ajakbo inyaksü makok, anungji asenoki asen tejangraba asen tashi den putepa dang ayutsüla.

Meimchir tashi maittem den medemdang nung, Tsüngremi Pa nükjidong temulung lemteta inyaksü akoker. Mezüngbuba pa tashi tendangtsü menüngdaker. Nisung teimbai Tsüngremi akoker ta nangzüker.

Iba jagi asenok koda yarir? Tsüngrem tashi aser nisung tashi mait nung kechi tetsüingda adoka lir, ibaji jungteptsü asoshi Tsüngremi lenmang ka bushiteta lir aser ibaji taochi lenmang. Pa taochi agi Pai asenok tashi mait angatetter, aser taochi ajanga Pai asenok yaritsü asatet. Temeim agi asenoki makokba Pai inyaksü. Asenok alangzüksü asoshi Pai pei chir yok.

Pai asenok meim nung taküm tia aika nung Pai Pa teyari asenok nem agütsü. Pauli ashir, "Tsüngremi ne nungdak dang tali agütsütsü akok". Kasa Tsüngrem shibai Paul anogo nung inyak tanüa asenok dak aser asenok ajanga Pa taochi rendaktsütsü akoker.

Sarasadem : Temeim Kibur, Nai onok ajanga atalokdaktsütsü akokba mapa tajung aser tulu bushitsü onok dak ajungshiang; Yisu asoshi. Amen.

Israel-i maneni Palestine nung Khristantem anema inyaker

June 28, 2023: Israel-i maneni Yirusalem nung Muslim nung aser Khristantem indang temeshi tesemtem anema inyaker; Yirusalem ya yimsü asemprong (Yihuda nung yimsü- Judaism, Khristan aser Islam) atema arok temeshi yimti lir, ajisiüaka iba yimti ya Yihuda nung yimti kija kümduktsütsü nükjidong nung parnoki Khristantem aser Muslim nung anema inyaker.

May 28 nü tatalokba dak sendakba nung World Council of Churches (WCC) General Secretary, Rev. Jerry Pillay-i, Yirusalem nung Khristantem sentong ka agiba anema Yihuda nungeri nokdakbaji onoki sashia aitsür, ta metetdaksü.

Paisa, Yirusalem ya yimsü asemprong atema temeshi yimti lir, ta ashi.

Tesüiba küm aika tsüingda Israel-i shekel sen billion aika archaeological tourism projects nung indokogo, aser iba ya Judaism ajungkettsütsü nükjidong nung lir.

Tawa Israel-isa Elad Association (City of David)-i ketdangsä ali tua bushisüingdangba aser project balala nung shekel sen billion aika indoktsü, ta sangdongogo. Item project ajak ya Yirusalem



May 28, 2023 nü Yirusalem nung Evangelical Khristantem rally agidang tangokba noksa nung angur.

Yihuda nung kija maitsü kümduktsütsü nükjidong nung inyaker.

Israel-isa ali tua bushisüingdangba aser sobaliba sentongtem nung sepaitem aser kaketshirtem nem shilem agidaktsütsü atema budget aika lemzüksüogo.

Anogo shia Israel-i Yirusalem ya Yihuda nung kija meyong kümduktsütsü atema inyaker, ibayongji parnoki Khristantem aser Muslim nung anema inyaker.

Tesüiba ita ishika tsüingda Tenla ki telung aika bensatsüogo aser Khristan lepertem raksatsüba den külemi

Khristantem processions sentong agidang timtem agütsüba tatalokba aika lir.

Joko tangbo iba temeshi yimti nung Yihuda nung masüba nisungtem ajak anema inyaker. Tang tesüsa Khristantem yimdong sä sentong agiba mapa nunga amak; Khristan kiojentem raksatsür aser putirtem densema yimsü lenirtem amaker.

Yirusalem nung Khristan maitsütem aser Tenla kitem raksatsür, talisa right wing sorkar aruba sülen nungi tenzüka Khristantem anema inyakba kanga bulua kümogo. 2020 küm Israel nung

Khristan nütsüing shilem 1.4 renloka liasü aser tang Israel nung Khristan nütsüing 182,000 dak tema lir.

Vatican, Italy, Spain, France, Greece, Belgium aser United States linüktem nungi Ambassadors-i Israel nung Khristantem anema inyakba osang metetpelar aser mita repranger.

Tang Israel nung Muslim aser Khristantem tekülem ki aser kiojentem raksatsür, ajisiüaka tensa tamajungba kuma nisung-a tepset tenzüksüa akok, ta ambassador temi tebilemsü katsür. Yirusalem nung Arogotemi, Yirusalem yimti

nung Khristantem anema inyakba Isreal sorkari menokdangteter, ta aitsür.

Yirusalem nung Arogotem aser tamangertemi, tawa Khristantem anema inyakba kanga bulua akümba ajanga yimti nung tesünep raksatsür, ta aitsü.

Abrahamic yimsü asem amangertem- Khristan, Yihuda aser Muslim nungertem Yirusalem nung küm aika tesünep nung dang lia aruogo, ajisiüaka tawa tanü item ama tatalokba ajanga yimti nung tesünep raksatsür.

Yirusalem yimti ya tamangba yimsü balala amangertem aika aliba yimti lir, aser iba yimti nung yimjung aser tesünep alitsüji kanga tongtibang, ta aika tangatetba lir.

Israel nung yimtenren tsütsü mepetmesü aliba aser Israeli-Palestinian raraba mapang ka nung Arogotemi sorkar tashimaitba atema aitsür.

Khristantem karibo, East Jerusalem nung Palestine nung Khristantem aser Armenia nung Khristantem arua melidaktsütsü nükjidong nung Israel nung yimsü alia amangertemi asalentong yanglur inyaker asütsüa akok, ta bilemer.

AO OSHI ANGAZÜKDAK:
TANÜ ANGAZÜKTSÜBA OJANG



Rematok

(v) melii aküm, topur tajung sentsü jena ao (wither, fade away)
* Mimong nung mi rematok aser tejak nung sentsüa **rematok**.

Rembang

(v) nembang, tejak aser tebok telong ser mejang (cover up, sleep face down)
* Tajungsangi chipo anpo ajak rembanga yur **rembanga** mejanga liasü.

OLONG PAITEP # 6560

1			2		3		4		5
6		7							
					8				
9				10					
						11			
			12						13
	14								15
					16				
			17						
								18	
19									

TIPIEN

- 2. Teburtemi tejak nung awaba - (8)
- 6. T _ _ _ em - (3)
- 8. Tzüak ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikali iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6559 TELANGZÜBA

TIPIEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden,
- 3. Kioktsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.

Agüja aliba noksa nung tejak kwi angur, bushiang



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Arunachal nung taoba minister 2-i Congress nung aden

Itanagar, June 28, 2023
(Agencies): Arunachal Pradesh nung sangküm Assembly election agitsü lir aser iba atema tanü opposition Congress tashi itshio.

Pema Khandu nung taoba home minister Kumar Wai-i New Delhi nung Congress züngsem aküm. Ano. Khandu'er cabinet nungsa minister inyaker Rajesh Tacho-ia Congress nung aden.

East Kameng district kübok Bameng assembly constituency nungi Wai-i kümsük asemben (2004 nungi 2019) Congress MLA ama inyaka liasü. Ajisiüaka, 2019 nung pai NPP ticket amer toktepdang BJP candidate Goruk Pordung tsüngdang tamakok angu.

Külen, Tacho-i Anini constituency nungi kümsük punguben tashi Congress candidate ka ama takok ngua aru

aser 2014 nung pa BJP nung aden. 2017 küm Pema Khandu-i aniba BJP sorkar mapang pa cabinet nungi anetsü aser 2019 elections nung pa metoktep.

"Iba ya Arunachal Pradesh aser linük nung Congress atema tetenzük tajung ka lir" ta Arunachal Pradesh Congress Committee (APCC) president Nabam Tuki-i tena pelashishia agizükba metetdaksü.

Züngsem 60 agi akümba Arunachal Pradesh Assembly nung Congress MLA 4 lir.

"Lennir ana ya tanaben kidangi aruba ama lir kechiyong tenaprong Congress nung liasü. Iba ya tetenzük tajung ka lir aser tarutsü anogotem lennir tejentemi maneni iba ama lemtet agitsü imlar" ta pai ashi.

"BJP ama masü saka Congress-i loktiliba nung telok

ajak atema inyaker" ta Tuki-isa ashi.

Paisa party züngsemtem dang teküpoktiba jenjang nung Congress tashi itdaksütsü aser Arunachal Pradesh aser linük nung Congress sorkar arudaksütsü atema inyaksü ayongzük.

Tuki lenisüba tashi itdaksütsü atema pai Congress nung adener ta Wai-i ashi. "Linük nung democracy lendong nung lir aser Congress-i dang democracy kümzüka yutettsü. Centre aser state nung BJP sorkartemi telemsa yur inyaksangshiba anendaksütsü atema ni Congress nung aden" ta pai ashi.

Külen, Tacho-ia pa Congress nung adenba ya kidangi meyipa aruba ama lir aser nübertem asoshi tejangraba mesama lir ta metetdaksü.

Mizoram CM Zoramthanga-i Zo kin ajak longjemtsü ayonger

Aizawl, June 28, 2023
(Agencies): Mizo National Front (MNF)-i 1961 nungi Zo kin ajak longjemtsü atema mapa inyaka arur ta Mizoram chief minister Zoramthanga-i metetdaksü.

Tawa tu pai Manipur chief minister N Biren Singh den jembidang MNF-i 1961 nungi Zo kin ajak ka akümtsü aser ketdangsubaren ka kübok anioxtsü atema inyaka aruba osang lemsatep ta Zoramthanga-i ashi.

Saitual nung MNF block conference nung jembidang pai iba osang metetdaksü.

MNF-i tetsükdaksü aika ajuruaka tejakleni aoer. MNF motto "For God and My nation" nung akangakanga noktaka lir. Party lennirtem ajanga masü saka Tsüngrem taochi ajanga

party ajungketogo aser maneni sentsüpranger ta CM Zoramthanga-i ashi.

India nung Zo mesüra Mizo kin ajak ka kuma longjemtsüba aser administrative unit ka kübok anioxtsübaji Mizo National Front (MNF) indang nükjidong rongnung ka liasü ta taoba ita Zoramthanga-isa shio.

Manipur nung Kuki MLA 10 aser Indigenous Tribal Leaders' Forum (ITLF) ajanga Manipur sorkar dang tenemlen tesemtem atema administration balaka meshiba mapang pai iba osang metetdaksü.

"Mizoram den kidanger state tem nung Mizo nunger aliba tesemtem ka akümtsüba aser Greater Mizoram tangatetba nung administrative unit ka akümtsübaji

Mizo National Front indang takhangba liasü. Iba onük ya India sorkar den yimjung olemtepdang benoka jembiogo" ta Mizoram CM Zoramthanga-i ashi.

Constitution of India nung Arlla 3 kübok iba mapa inyaksü akok ta Centre-i ashi. Ajisiüaka Mizoram-i 'Greater Mizoram' mesüra Manipur nung Mizo nunger aliba tesemtem ka akümtsü atema Manipur indang internal affairs nung indangindang meinyaktettsü, ta pai ashi.

"Iba mapa ya Manipur nung asen adianutemi tenzüksüla kechiyong Chin-Kuki-Mizo-Hmar-Zomo kintem longjemtsüba ya ozüng ama meshitettsü" ta Zoramthanga-isa metetdaksü.

Tripura 'rath yatra' nung nisung 6 electricity agi puset

Agartala, June 28, 2023
(Agencies): Tripura kübok Unakoti district nung 'Ulto Rath' yatra agidang nisung 6 light agi puset.

Kumarghat tesem nung 'Ulto Rath' yatra indang kor gari (chariot) kati high-tension electricity line nung kongshidang nisungtem asü aser 30 shi ka yiru.

Iba lendong nung tasür ajakji ISKCON devotees lir aser parnok ya kor gari sülen anidaka liasü.

Iba benjung ya Lord

Jagannath-i anogo tenetnü lir pa indang shrine-i aoba nungtem nung amonger, ta MLA Bhagaban Chandra Das-i ashi.

Tasürtem rongnung arishi küm 9 tanur ka dena liasü. Lendong atalokdak nisung 6 asü aser 30 tashi electric shock agi yiru ta Das-isa ashi.

"Tanü Ulto Rath nung electrocution lendong nung tekülemer aika taküm samaogo. Iba tatalokba atema temulung raksar aser tasür kibongtem den

mangyim lemsar, maneni yirua alirtem tekaraba nung aneptsü moatsür" ta Chief Minister Dr Manik Saha-i metetdaksü.

Power Minister Ratan Lal Nath-i iba tatalokba atema bushisüngdang ka asütsü tetuyuba agütsüogo.

Ni local MLA Bhagaban Das aser Tripura State Electricity Corporation DGM den jembiogo. Ni ketdangsurtem dang bushisüngdang asütsü tetuyuba agütsüogo" ta Minister Nath-i ashi.



Arunachal Pradesh Service Pensioners' Association (APSPA) indang East Siang unit ajanga primary schools adopt asüba sentong nung agiba noksa angur. APSPA-i East Siang district nung Tako Gao Memorial Primary School adopt süogo aser maneni Pasighat aser Mebo block tem nung school kaka adopt asütsü sentong lir ta metetdaksü. APSPA-i academic activities aser infrastructure ajungkettsü atema school tem adopt asütsü lemtet.

Kü tenüing Khan aser ni ashikülaker masü: Imran Khan

Lahore, Aami/June 28 (Agencies): Taoba Pakistan ato kilonser Imran Khan-i Mongulbarnü Pakistan Army dang pa apuba mechi May 9 nü longkak aita linük nung r o n g r o n g - s h i r o n g adokdaksüba nung tai tonglokja alirtem ken o linük indang anti-corruption watchdog nem jembidaksütsü ayongzüka liasü.

"Yashi DG ISPR ajanga onok ashikülaker ta ashi. Linük anema nokdakba ya kanga tamajung mapa lir. Nenok ket nung aliba kuli bener arung, onoki onok kuli bener arutsü aser yimjak nung jembiti," ta Pakistan Tehreek-e-Insaf (PTI) tekolakba Imran Khan-i PTI züngsemtem police ket nung aliba athishia ashi, shirnok May 9 lendong atema tetsübotsü Army Act kübok obendangtsü akok.

"TV nung live sayua ken o jembitsü ni akhanger, anungjidang onoki ajangshiba linük dang ashitsü ni maongka

angutsü. Ni koma ashioxtsü, küdang koma tiazü jembii. Pakistan indang tarutsü telemtetba Dubai nung ochimashir temi agi. Alima nung yamaji kecha nunga mangutsü," ta Imran Khan-i ashi.

Khan ya Pakistan Peoples' Party (PPP) aser Pakistan Muslim League-Nawaz (PML-N) tsüngta senden ka Dubai nung amenba indang athishia jembiba lir, kong party ana ya election atema tasa yanglur, koba küm tatemlen agitsü akok.

Pakistan nung itdangiterba agency, Inter-Services Intelligence (ISI) ajanga pa jakdang ato kilonser inyaka alisang Nawaz Sharif aser taoba tir Asif Ali Zardari nungner ya auyartem lir ta miimshia ashi, ta Imran Khan-i temai adoktsü.

"Pakistan ya arem indang ozüing kübok anir. Zardari aser nung mener Pakistan nübur tia

atema telemtetba magitetsü," ta pai ashi.

"Kü tenüing Khan aser ni ashikülaker masü - kü arishi tepiyong ni Pakistan tenzüik. Tai tongloktsüba kuli sayuang mesüra tatok meshiang," ta Khan-i ashi.

PTI züngsemtem ya army matsüngdangi ano anir maru, ta linük indang attorney general-i Pakistan Supreme Court dang Mongulbarnü ashi. Military court nung civilian indang ken o mejembir, ta Mansoor Usman Awan-i tematiba court dang ashi.

Hombarnü Pakistan Army ajanga ashiba agi, parnoki lieutenant general ka densema ketdangsur asem mapa nungi anentsüogo aser May 9 rongrong dak sendakba nung sepai tanishir 15 anema ken o jembiba tembangogo.

Ajisüaka Pakistan Army indang odongtar Maj Gen Ahmed Sharif Chau-dhry-i item tashishirtem tenüing mashi.

Wagner tekolakba Belarus tongogo: Lukashenko

Minsk, Aami/June 28 (Agencies): Wagner tekolakba Yevgeny Prigozhin Belarus tonga aoba indang osang Belarus tir Alexander Lukashenko-i jangjatsüogo.

Tiri ashiba agi, pai iba mercenary telok nem khen atema anenzüka atatsü asoshi mamshi-i aliba military tesem ka agütsüogo aser iba tesem nung anenzüker aliba mapang taruba jenjang kechi agitsü aji bilemdangtsü.

Wagner telok yagi Russia indang military lenirtem anema nokdaka Moacow-i aotsü aliba Lukashenko-i teyongtsüi ia inyaksangshiba ajanga nokdangteta tenangzüktepba ka yangluogo.

Lukashenko-isa, Belarus nung Wagner recruitment points kecha mamenoktsü, saka lisopurtemi iba telok nung adentsü akok, ta ashiba den shirnoki iba amala telemtetba agidir parnoki tasütsü lendong aliba indang angatetsüla, ta tekümdangtsü metetdaksü.

Wagner teloki military anema nokdakba kuli indang asüngdangba mapang Belarus lenir yagi, iba ya Russian Defence Minister Sergei Shoigu aser Prigozhin na tsüngda mangatetep aliba ajanga lir ta ashi.

"Ni Shoigu mapa meteta lir, ajisüaka pa khen khenbo tim masüba nung aitsür," ta pai ashi.

Lukashenko-isa, pa dang teyongtsüi ia inyaksangshir ka ta teja ta ashiba den pa ya iba mepetmesü nung shilem agir ka, kechiyong iba ya Russia aser Belarus na arok tebilemtü lir ta shisem.

Paisa, iba mepet mesü nungi angazüktsü nungdaker, ta ashi.

"Iba amala military teloktep ya kanga junga meita atatsüla, aser parnoki mepeshibatem mapang shitak nung telangzüba agütsütsüla," ta pai ashi.

Kasa mapang nung Putin pusemertemi ashiba agi, iba mepetmesü ajanga pa yimsüsüba tashi meiti maküm.

Wagner teloki military

headquarters ka atsüingba den Moscow leni aoba aser military tayimtsütem khazüka yokba ajanga Putin indang tashi tajemba kümdaktsü asü ta asüngdangba mapang Kremlin otongdar Dmitry Peskov-i, political commentators temi ken o dak alia jembir aser onoki iba ya magizüker ta ashi.

Putin-ia, hopta tatemi iba mepetmesü adokba ya Russia army asoshi takok ka ama kümdaktsüogo.

"Nenoki civil war ka nokdangogo," ta Putin-i defence ministry, National Guard, FSB security service aser interior ministry nungi sepaitem dang Kremlin kima Wagner teloki tepsetertem nem aküm tetushi agütsüba mapang ashi.

**Office of the
MOLUNGKIMONG OZUKUM KIDONG
TENUNGSANG TETUSHI AGÜTSÜR**



Wb. Temjensoba Ozukum aser Wt. Yungdangsenla, tena jala **T.Arenia Ozukum**-i English and Foreign Languages University, Hyderabad nungi "Young Adult Literature in the Indian Classroom - A Critique of the Mainstream Pedagogic Practice" nung PhD in English Literature ngutetba asoshi kidong-i pelaba lemsateper. Maneni nü takum aser wadang ajak nung Tsüngrem lenisüba denang ta kidongi sarasademtsür.

**Sd/-
(A. Rongsen)
President****Sd/-
(I. Bendang)
Secretary**

**OFFICE OF THE
AO SENDEN**
"Kübur Asashi" (For the People) Date : 28-06-2023

SANGDONGER

Ao Senden tawabangba kübok Ao Senden Literature Board (ASLB) ajanga Ao oshi zülumen liromedema zülutsü mechi nung school tem nung Ao oshi tesayurtem atema zülumen jangjashiyim sentong ka Chideni 4, 2023 anepdang 10 ako nungi tenzüka Ao Senden Office Conference Hall nung akatsü ayonga lir. Anungji iba sentong nung Ao subject tesayurtem ka danga mezüdoki arua adentsü metetdaksür. Iba den külemi school tem shia nung tekolaktemi pei school nung Ao oshi tesayurtem ajungshia iba sentong nung dendaktsütsü metetdaksür.

**Sd/-
(Chubawati Longchar)
President****Sd/-
(Imtipokym)
Gen. Secretary**

**Settsü Baptist Arogo
Women Ministry, Settsütsür Telongjem**



Anogo: 4th July, 2023
Mapang: 7:00 AM - 3:00 PM

Item ya angutsü :
Aonsotsü, Pongsen, Chitem (Settsü Special), Handicraft, Fun Fair etc.

METETDAKTSÜR

Asür Sangyumongba'er jala Imisangla (Molungyimsen) dang shirnokisa sen apuja ali ibaji onoki memetet. Anungji iba sentsühji onoki memenoktsü aser kulia masütsü aser kecha khuret mabentsü ta kinunger lemtet metetdaksür.

**Sd/-
Asür Sangyumongba'er kinungertem.
Molungyimsen.**

POLICE BAPTIST CHURCH MOKOKCHUNG
P.Box No. 40, District Mokokchung-798601, Nagaland

ADVERTISEMENT FOR PASTOR'S POST

Criteria:

1. Qualification: BD/M. Div and above (from recognized Institution/University).
2. Ministerial Experience: 12th years and above.
3. Pay Matrix
 - Basic pay - 16,100 / +DA (25%) - 4,025 / + MA - 800 / + OA - 2000 (Total = Rs. 22,925).

Note:-

- Interested candidates may submit their application and necessary Documents on or before 31/07/2023.
- Only short listed candidates shall be called for interview.

For Queries: - Contact: +918414044961 / +918132902210

**Sd/-
Chairman PBCM**

**Government of Nagaland
Office of the Deputy Commissioner
Tuensang: Nagaland**

NO.EST-27(PT)/2022-23/ Dated, Tuensang the 27th June 2023

ADVERTISEMENT

In pursuance to the Government of Nagaland approval **NO.CNE/DLRB-DA(MTS&DB)/2022(Pt-1)/2355**, Dated Kohima the 13th January, 2023 application are invited from the indigenous inhabitants of Tuensang District for the following post under the establishment of Deputy Commissioner Tuensang

<u>Sl.No</u>	<u>Name of Post & (Pay Matrix)</u>	<u>Total No. of vacancy</u>
1.	Multi Tasking Staff (MTS) (Level-1)	2 (two)

Education qualification and age:-

- The candidate should have read up to class VIII.
- Age limit : - Minimum 18 years & maximum 35 years as on 01/01/2023
- Further age concession for serving Government employees will be relaxed, the equal no. of years in service subject to a maximum of 5 years.
- Upper age limit for Persons with Disabilities (PwD) is further relaxed by another 10 years, wherever applicable.
- Applications forms can be collected from the office of the Deputy Commissioner, w.e.f 11/07/2023 to 10/08/2023 during Office hours (10:00 hrs to 16:00 hrs). Those applicants who have submitted their application earlier are directed to obtain the application form and apply fresh
- Last date for submission of application form is 11/08/2023. No applications shall be entertained beyond the last date of submission.
- Candidates are asked to submit a photocopy of indigenous certificate and 3(three) copies of recent passport along with the application form.
- The date and venue of examination will be intimated through the issue of admit cards.

(LITHRONGLA TONGPIRUTSA) NCS
Deputy Commissioner,
Tuensang : Nagaland.

Women Football League: KISCE aser FAPD nati takok angu



Kohima, Aami/June 28 (TYO): Youth Resources and Sports Department-i ayongzüka IG Stadium nung tang asaya aliba Ibuba Nagaland Open Women Football League cum Knock-out asayamung nung Bodhbarnü Khelo India State Centre of Excellence (KISCE) Kohima aser Football Association Phek District (FAPD) nati pei tata asaya kokogo.

Bodhbarnü mezüngbuba asaya KISCE Kohima aser Hilly Girls FC na asaya liasü. Iba asaya ya KISCE Kohima-

i goal 5 agi koka liasü. Iba asaya akokba sülen KISCE puri asaya asembuba atonga kokogo aser team pongu toktepba asayamung nung parnok temaba jenjang nung lir.

Iba asaya nung Imlimeren Jamir-i asaya tenzüker second 26 nung mezüngbuba goal idakja asayamung nung goal takaratiba idaktsüba otsü tasen ka yanglu. Laisa ano goal ka idaktsü aser Neke-i goal ana aser Nouno-i goal ka idakja parnoki iba asaya ayong ayonga koka liasü.

Tanabuba asaya nung

Football Association Phek District (FAPD)-i goal 2-0 agi Peren District Women Football Club (PDW FC) akokba sülen mezüngbuba full point nguteta liasü.

Asaya nung goal anaprongla ya Lhuvekholu Tetseo-i idakja liasü.

Tang tashi nung FAPD-i point 4 nguteta parnok tanabuba jenjang nung lir.

June 29 nü asaya:

1. NAYSA-C vs Hilly Girls FC @ 3PM
2. KISCE Kohima vs PDW FC @ 4:15 PM.

India-Pakistan na World Cup asaya Ahmedabad nung asayatsü

Mumbai, Aami/June 28 (Agencies): 2023 ODI World Cup group stage nung India aser Pakistan na October 15 nü Narendra Modi Stadium in Ahmedabad nung asayatsü. Narendra Modi Stadium ya alima nung stadium tulutiba rongnung ka lir aser iba stadium nung nisung lakh 1.32 asemtsü. World Cup atema mapanglem International Cricket Council-i Mongolbarnü metetdaksüogo.

Ajisüaka Pakistan Cricket Board-i ashiba agi, iba asayamung nung shilem agitsü atema sorkari temelaba agütsütsü nungdaker.

"Asayatsü aliba tesem densema India nung oa asayatsü atema PCB-i Pakistan sorkar temelaba nungdaker. Onoki sorkar den tongtepretepar aser osang angazükli metetdaksütsü. Kasa osang ya onoki hopta ishika tejakdang

ICC nem metetdaksüogo," ta PCB otongdar kati ashi.

Ajisüaka iba asayamung nung shilem agitsü atema Pakistan team India-i arutsü ta ICC-i temulung lema bilemer. Pakistan-i World Cup nung shilem agitsü atema participation agreement nung sign süogo. Onoki parnok iba asayamung nung shilem agitsü noklang nung noklang imlar aser parnok shilem magitetsüsa kecha temaitsü sayua mali. Team 10-i shilem agiba World Cup ka ayongzüksü onok rangloker lir aser iba sentong nung Pakistan densema lir. Züngsem ajaki pei linük temzüng ozüng sülen anidaktsüla aser aji onoki akümtsübur. Ajisüaka iba asayamung atema Pakistan team India-i arutsü ta onoki temulung lema bilemer," ta ICC otongdar kati ashi.

PTI-i Karachi nungi

sangdong ka ajanga ashiba agi, World Cup mapanglem aser asayatsüba tesemtem dak sendakba nung PCB-i tashishiba kar agütsü saka ICC-i magizük. PCB-i Afghanistan aser Australia na den asayatsü aliba tesem melenshütsü mepeshi saka magizük. PCB-i ICC aser BCCI dang Afghanistan den Chennai nung asayatsü aliba ya Bengaluru-i melentsütsü aser Australia den Bengaluru nung asayatsü aliba ya Chennai-i melentsütsü mepeshia liasü.

Pakistan team management-i Chepauk nung spinner tem nem teyari kanga agütsür asünung iba ajanga Afghanistan den asayaba mapang parnok asoshi tetsükdaktsü asütsü, kechiyong Afghanistan team nung spinner tajung aika lir, ta shia liasü.

Pakistan team tesüsa India nung 2016 küm T20 World Cup nung asayaogo.

Odisha FC-i Amey Ranawade aser Lenny Rodrigues na anisemogo

Aami/June 28, 2023 (Agencies): Odisha FC-i sangdong ka ajanga Mumbai City FC nungi loan nung Amey Ranawade anir aruba metetdaksüogo.

Amey Ranawadeya mezüng DSK Shivajians nungi asaya tenzüker aser iba sülen Mohun Bagan nung asayaba mapang ajaki meteta aküm. Mohun Bagan nungi asayaba mapang pai 2018-19 season nung CFL Cup (Calcutta Football League) kokogo. Iba sülen pa FC Goa aser Bengaluru United nungi asayaogo.

Pa Indian Super League (ISL) 2020-21 season nung Mumbai City FC nungi kanga takok ngua asayaogo. Defence nung asayasang yagi Mumbai FC puri ISL akokba aser League Winners' Shield akokba nung teyari tulu agüja liasü.

Kasa mapang nung Odisha FC-isa Hombarnü Lenny Rodrigues küm ka atema alizükba sangdongogo. Pa den ano küm ka atema tenanzüktepba yanglshitsü lenmang lapoka yuogo.

Rodrigues ya midfielder ka aser pa Odisha FC nung maden tsüngda India nung club balala

nungi asayaogo.

Rodrigues ya Churchill Brothers nungi asaya tenzüker aser iba sülen Dempo nung aden aser Bengaluru FC aser ATK Mohun Bagan nungi asaya liasü.

FC Goa puri Super Cup akokba mapang pai kanga tongtibang shilem agiogo. Rodrigues-isa, I-League anaben, ISL League Winners' Shield, Federation Cup aser Durand Cup kokogo.

Maneni pa India team nungia asayaogo aser Nehru Cup akokba team nung pa densema liasü.

Global T20 Canada: Harbhajan, Gayle, Malik nunger asayatsü

New Delhi, Aami/June 28 (Agencies): Wara poktetba ajanga küm asem tashi masayai lir Global T20 Canada season tasembuba taküm asayatsü aser iba atema Hombarnü nungi ticket ayok tenzüko.

Iba marquee asayamung ya CAA centre, Brampton Canada nung July 20 nü tenzüksü aser final August 6 nü asayatsü.

Taküm iba asayamung nung Toronto Nationals, Brampton Wolves, Montreal Tigers aser Vancouver Knights den team tasen Surrey Jaguars aser Mississauga Panthers nungeri shilem agiba angutsü.

Iba asayamung nung team ajak group stage nung asaya tenetnet asayatsü. Playoff phase nung temaba jenjang nung tembangba team ana Qualifier 1 nung final atema asayatsü. Tasembuba aser pezübuba nung tembangba team Eliminator asayatsü. Qualifier 2 nung Eliminator akokba team aser Qualifier 1 nung tamakok anguba team asayatsü aser takoker final-i aitsü.

Group stage atema ticket

tem www.gt20.ca nung USD 5 nungi USD 100 tashi nung yokdar. Playoffs aser final atema-a ticket tem yokdar.

Taruba asayamung indang jembiba mapang Global T20 CEO Richard Berridge-i ashiba agi, "fan tem tajangshiba ya onok atema kanga tongtibang lir. Taoba asayamungtem nung fan temi telangzüba tajung agütsüogo aser Global T20 Canada season tasen ka ayongzüka asayatsü yongya atar. Telangzüba tajung agütsütsü imla onoki iba asayamung nung shilem agitsü asoshi fan tem jaoker."

Fan tem atema taküm iba asayamung ya jangrademtsüka asütsü kechiyong alima ajanga nungi asayar tajungtem iba asayamung nung shilem agiba angutsü. Asayatem rongnung Harbhajan Singh, Tim Southee, Chris Gayle, Alex Hales, Shoaib Malik, aser Shakib Al Hassan nunger amala nungtugu asayatem densema lir.

July 20 nü mezüngbuba asaya Brampton Wolves aser Mississauga Panthers na asayatsü.

Tottenham Hotspur-i goalkeeper Guglielmo Vicario alizükogo



Aami/June 28, 2023 (Agencies): Tottenham Hotspur-i, Empoli nungi goalkeeper Guglielmo Vicario alizükogo.

Osang ajanga ashiba agi, Guglielmo ya pound million 16 agi alizüka liasü.

Arishi küm 26 tain asaya Vicario yagi Spurs' captain Hugo Lloris nem tetoktepba ka agütsütsü, shiba club den tenanzüktepba yanglur aliba tembangtsü asoshi ita 12 dang anunga lir.

Kasa mapang nung club sangdong ka ajanga ashiba agi, Italy nunger international asayar yagi club nungi 2028 küm tashi asayatsü atema tenanzüktepba ka yangluogo aser pa jersey number 13 asemtsü.

Pa taoba mapang Udinese, Cagliari, Perugia aser Venezia nungi asayaogo aser Empoli nungi taoba season ana asayaba

mapang kanga junga asayaogo. Iba transfer window nung Tottenham puri asayar alizükba rongnung Vicario ya tanabuba asayar asütsü.

Dejan Kulusevski, Juventus nungi loan nung arua asaya liasü aser pai Tottenham nungi asayatsü telemteba agia pa den mezüngbuba tenanzüktepba yanglua liasü.

Vicario ya asaya kanga junga aziüoka asayaba asayar ka ta züngshir aser pai tesülen nungi kanga junga asayateter.

Pa 2015 küm August ita Venezia-i ao aser iba club nungi tetoktepba balala nung asaya 89 nung asaya liasü.

Italy nunger asayar yagi asaya 28 nung goal ka danga midaktsüi kanga junga amen aser 2016/17 nung par team Serie B-i aiba nung teyari agütsü aser iba den Coppa Italia Lega Pro-a koka liasü.

BILEMDANGANG

"Tamajung melena tamajung lepa agütsütsü temerang."